



Rabu, 13 November 2024

Ogen: Matius 18:15-16



“Katakan Salahna Tupung Kam Dua-dua”



W *Adi ersalah seninandu man bandu, **katakenlah** man bana salahna e, **asum kam dua-dua**. Adi **erkadiola** ia, enggo kap idatndu ia mulihi. Tapi **adi la kam ibegikenna, babalah temannu** sekalak ntah dua kalak gelah bagi tersurat i bas Pustaka Si Badia: "teptep pengadun enggo sah adi lit dua ntah telu kalak saksi." Megati alu la si sedari sinik (kurang peduli dengen peka) kita tupung lit kesalahen si terjadi i lebe-lebenta. Nina Matius; dikune lit kalak ersalah man banta, kataken kerna salahna e, ula sinik. Si enda ngataken maka, salahna e nembah dengen ciga ateta tapi jelmana mekuah ate dengen ula sirangken tapi persingeti gelah lit dalanna robah. Jenari caranta ningetkenca pe la banci terem-teremi tapi tupung kita dua-dua, engkai maka bage? Gelah kita banci ngerana tangkas ukur tangkas kata (la lit pihak ketelu si ncampuri cakapta erbahanca reh gerupuh-sontarna) bage pe si ersalah e la lit perasanna tempa ia permelaken. Dikune persinget si isehken e la ibegikenna, e maka banci kita mindo penampat man temanta guna mpersingetisa janah e pe tetap la banci teremi (dua/telu kalak).*

Kataken salahna tupung kam dua-dua, enda si jadi tema wari enda. Husus kita ercakap kerna perbulangen ras ndehara. Di kune lit kesalahen perbulangenta man banta entah man isi jabunta, persingeti anjar-anjar, tupung dua-dua. Ula pediat kesalahen si kitik e, reh belinna pagi adi la ipersingeti. Ceda hubungenta ras pasangenta adi si sinik-sinikken saja kesalahen e. Adi dua-dua me banci tangkas ukur tangkas kata. Ula sirangi dengen sinikken gelah lit dalanna robah dengen jera. Rubat pe kita ras perbulangenta guna si mehuli labo dalih. Labo gelah sirang tapi reh jadina ate kenca situri-turin ukur. Nina Pdt. Andar Ismael, boleh ribut tapi rukun lagi. Judul bukuna "selamat ribut rukun."